

JUDAS

Judasbi kallari parluguna

Kaida escribij Judasga Santiagoj (shinaidi Jesusbuj) waukimi gashka; na Manduj Jesusta k'atusha japichij Judaschu gashka. Paiga tuki maibish tandanukushka crijkunamumi Jesucristo wacharishka sujta chungu pichka (65) wata k'ipa shina-bimi escribishka yuyachin.

Judasga tuki crijkunadaga llullaj yachachijkunamunda wakichirichun shinaidi kabishka parlashkada na kungarisha jinchi katichun nishami escribiga.

Judas saludashkamunda

¹Jesucristobujta ruruj shinaidi Santiagoj wauki Judasmi gani; Taita Dios k'uyashka shinaidi Jesucristomu wakichishka kayashkagunamu escribini. ²Dios kangunada llakishkash,^a k'uilla kausish, k'uyanukunash kangunabi kutin kutin mirarichun.

Pakalla waigusha wagllichish nijkunamunda

2Pe 2.1-7

³K'uyashkagunalla, kangunadash ñukadash kishpichishkamunda escribingu pachundi munagani; shinash kununga crinamunda manchanaidi takanukuj shina jinchi katichun nisha ninashkalladadimi yuyasha escribini. Crinamundaga Diosbujlla gajkunamu shuj kutinlla illujta yachachiga.

⁴Ñami kangunapurabi maijinguna pakalla satirishkagunaga. Chigunadaga ñaubamundadimi Dios escribichishkabiga 'shina llakichinaidimi' nishka gashka. Chigunaga maidash gachun rurujkunami. Ñukuchij Dios alligunada kushkada japij tukushalla ima millidash ruranguna. Shinaidi ñukuchij shujlla Amo, Mandaj Jesucristodaga yangabimi churanguna.

⁵Kai tukida alli yachukish kangunada yuyachisha ninimi. Mandujka israelgunada Egiptomunda llujshichishash k'ipamu maijinguna na criki chigunada tukuchishtagami. ⁶Shinaidi angelgunadaga paiguna imada mandachun churushkada sakisha maibi tiyanashkamunda shitusha riki Paiga chi jatun p'unllabi

^a 1.2 'Dios kangunada llakishka' nisha Paibuj misericordiadami nigun. Ro 9.15

llakichingaj naidij kacharibujti watushkami yanamangabi wakichishkada charigun. ⁷Chiguna layaidi Sodoma shinaidi Gomorra puebloguna chi kuchullabi tiyaj pueblogunabi kausajkunash piyunbish siririsha pingui illuj tukushami naidi ruranashka millida ruranukujkunaga. Kaigunada rikusha ama shina layaidi tukuchunmi na tukurij ninabi jatun llakida apachun churaga.

⁸Shinash pakalla satirijkunaga ‘Suñida suñugani’ nijkunaga shina layaidi kikinbuj cuerpoda mapalladati rurusha chibuj jawa Dios mandushkadash na allibi churashami, jawa pachamunda k'uilla gajkunadash na valichisha rimunguna. ⁹Angelgunada mandaj Miguelbish Moisesbuj wañushka cuerpodaga diablo kichusha nisha rimakish ‘Llaki tukushkanmu’ nisha juchachingajka, “Na kabinichu, Mandajlladi kanda juchachichun,” nishallami niga. ¹⁰Shina gakash chigunaga tuki imalla na rijsishkagunadagarin na valichishtan. Imada yachushash animalguna shina na intindij gasha chi yachushkagunanlladimi llaki tukunamunga apashka ganguna.

¹¹¡Paigunaga imachari tukunga! Caín katishka ñanlladadimi katishka.^b Shinaidi Balaam layami^c kuchkida japina yuyillan ratuidi pandarishkaguna. Shinaidi Corema layaidimi^d k'arinij gashkamunda chingarigaguna.

¹²Kangunapura k'uyanukusha jatun mikigunabiga paigunaga pandachingu mitikushka shinagunami. Paigunaga pidash na kazushalla kushillami mikunguna, ubiunguna. Paigunaj iksallabi yuyarisha michirishaga, waira apik'ichushka yaku illuj p'uyu shinami. Granuda kuna p'unllabi na apariki tirushtashka yuraguna layami. Ishki kutin wañushka shinami ganguna. ¹³Jatun yaku kucha p'iñayashkaidi jatarisha puskurij shinabimi paiguna pinganada rurusshkagunaga rikurishka gan. Chaida kaida rijlla luzeroguna shina gashkamundami na tukurij tukidash yalli yanamangadaga paigunamu wakichishkada charin.

¹⁴Adanmunda sujta taita k'ipa wacharishka Enockish Dios yuyida kukimi chi gentegunamunda, “Riki, Mandujka waranga waranga jucha illuj angelgunan shamugunmi; ¹⁵shina shamushaga tukigunada juchachingajka ima na alligunada maidash gachun rurusshkamunda, shinaidi Paida jinchi shimigunan rimashkamundash Diosta na manchuj juchayuj tuki kausujkunada rimashtangu shamun,” nishaga Dios nichikimi niga.

¹⁶Chigunaga tukidami washalla rimajkuna. Tukimundami rimajkuna. Kikinbuj milli munigunaida p'aktachingumi mashkanguna. Paigunaj shimigunabiga ‘Allimi gani’ nisha ima allida japingajllami shujkunadaga k'uilla uyanaidi shimigunan rimarijkuna gan.

Crijkunada yuyillandi purichun mañashkamunda

¹⁷Kangunagarin k'uyashkagunalla, ñukuchida Mandaj Jesucristobuj agllusha kachashkaguna ñaubamu ima nishkagunada yuyarichi.

^b 1.11 Gn 4.3-9; Heb 11.4; 1Jn 3.12 ^c 1.11 Nm 22—24; 2Pe 2.15-16 ^d 1.11 Nm 16.1-35

¹⁸Kangunadaga, “Kai tukuri p'unllagunabiga maidadikish nisha asij-kunami tiyanga. Chigunaga millanaiidi munigunallanmi puringaguna,” nigagunami. ¹⁹Shujkunada waglichijkunaga paigunami gan. Aicha munushkaida rurujkuna gashami Diosbuj Espiritudash na charinguna.

²⁰K'uyashkagunalla, kangunagarin wasichijkuna shina Diosbujti gana crishkabi jinchiyarisha Diosbuj Espiritu yuyachiki mañanguichilla. ²¹Ñukuchij Mandaj Jesucristo kangunamunda llakisha na tukurij kausida kungagama Diosbuj k'uyibi chaririashaidi shuyagüichilla.

²²‘¿Shinachumashigun?’ nigujkunadaga alli crij gangama yachachichi. ²³Shujkunadaga ninamunda aisushtasha kacharichinguichi.^e Kaishujkunamundaga llakirichi. Shinash yuyillandi purisha paigunaj churanalladash millanguichi. Chi churanagunaga paigunaj aicha munida rurashkamunda mapayashka shinami gan.

Diosta ‘Allimi gangui’ nishkamunda

²⁴Kununga kangunada urmachun na sakishalla chapungu Pudij, Pibuj p'alaniguj k'uilla gashka ñaubuki ima juchachinash illuj kushilladi rikurichun churungu Pudijtaga, ²⁵ñukuchida Kishpichij shujlla Diosga ñukuchida Mandaj Jesucristomundami ñaubagunamunda pachash kununbish ima urash na tukuringama, “K'uilladi, manchanaiidi jatun, tukida ruri pudij, tukida mandujmi gangui,” nishka gachun. Shina gachun.

^e 1.23 Ninamunda nishaga crijkuna apashka llakigunadama na gashaga tukuri p'unllabi juchachishkaguna uku pachabi gana ninamadami nigunga.